

30 Aña di SIMADANZA

ORANJESTAD - Dia 4 di augustus ultimo scol di baile SIMADANZA a celebra su trinta aña di existencia. E scol di baile a keda funda dia 4 di augustus 1975 y e prome lesnan a cuminsa dos dia despues. E scol a cuminsa funciona den Zuidstraat y e fundadornan tabata e docentenan di baile Astrid Salazar, Ina Profet y Diana Antonette. Despues e scol a muda pa su localidad existente den Dakota Shopping Paradise cu e docentenan Astrid y Ina. E lesnan di baile for di principio tabata dirigi riba baile folklorico, ballet, jazz. Pa locual ta e parti di folklore mester menciona e docente Astrid Salazar sigui e desaroyo di baile hopi dedicacion cu awe por papia di baile di folklore contemporaneo na Aruba. E docentenan ta sigui e desaroyo di baile den otro paisnan y ta experimenta localmente tanto cu e folkore como otro bailenan moderno manera jazz cu conoce hopi influencia di hip hop dancing y e conocido streetdance.

Formacion di specialmente nos hobennan riba tereno di baile na Simadanza ta tuma luga cu hopi disciplina y dedicacion, locual ta resalta tambe durante e shownan presenta den Cas di Cultura. Simadanza tabata tin su propio grupo di baile cu a percura pa presenta nos bailenan folklorico den hotelnan, eventonan cultural y den exterior na Santo Domingo, Radio City Hall na New York, Venezuela y Superbowl na Miami.

E alumnonan di Simadanza a baila entre otro dia 18 di maart 1976 den stadion Wilhelmina na ocasion di inauguracion di Himno y Bandera di Aruba

y durante varios bishita di miembronan di Cas Real Hulandes na Aruba..

Cu tempo e docentenan a scoge pa dedica hopi mas tempo na duna les na e alumnonan y asina a bira dificil pa mantene un grupo di baile cu mester a ensaya regularmente pa haci un bon presentacion na lugarnan publico. Despues cu e hobennan alcansa e edad di diesocho aña, hopi di nan ta bai studia den exterior y asina no por garantiza continuidad di un grupo di baile.

Afortunadamente diferente adulto ta regresa despues na SIMADANZA pa sigui lesnan di baile pa recreacion, pa tene

curpa den condicion y pa sigui e ultimo desaroyonan riba tereno di baile.

SIMADANZA ta orguyoso di por a contribui durante e ultimo trinta añanan na desaroyo di baile y formacion di nos hobennan riba tereno di baile. Diferente ex-alumno di Simadanza a scoge pa un estudio di sea bailarin of docente di baile. Simadanza ta spera cu pronto di por mira e docentenan nobo comparti nan conocimiento y experiencia cu nos chikitin, hoben y adultonan na Aruba.

Apesar cu mayoria di su alumnonan ta femenino, SIMADANZA ta un scol di

baile cu por ofrece lesnan di baile pa e ser masculino tambe, specialmente pa hobennan cu ta desea di

mehora nan pasonan riba tereno di baile baile contemporaneo manera, salsa, bachata, merengue, bolero y bailenan di nos propio folklore manera tumba, wals, mazurka, danza.

Tambe pa parehanan adulto tin lesnan di baile riba tereno di "party dancing".

E aña escolar nobo a cuminsa na Simadanza y e docentenan ta invita tur ex-alumno, alumnonan actual y alumnonan nobo pa participa na e lesnan di baile. Tur

atardi di dialuna pa diabierna ta acepta inscripcion nobo. Tambe por yama via telefon 582-6072.

SIMADANZA lo celebra su trinta aña di existencia na 2006 cu un tremendo presentacion di su alumnonan. E preparacionnan a cuminsa caba den tur les di baile pasobra SIMADANZA kier garantiza e pueblo Arubiano un otro presentacion inolvidabel di baile riba tereno di ballet, jazz, baile contemporaneo, folklore, streetdance etc.

Keda pendiente pa mas informacion tocante e celebracion y cursonan special na SIMADANZA.